

INUIT ATAQATIGIIT

INATSISARTUNI



Inatsisartut suleriaasianni § 37 naapertorlugu makkuningga Naalakkersuisunut apeqquteqaateqarpunga:

1.

Akuersaangilluinnarnissamik politikkeqarnerup atorunnaarsinneqarnissaa pillugu oktoberip 15-iani KNR-ikkut oqallinnermi Aatsitassaqaqarnermut Naalakkersuisup kukkusumik oqaaseqarnera Naalakkersuisunut uppernarsaqqara. Nammineq aalajangiiffigisassatut siunnersuutimi kingunerisassai pillugit tunngaviusumik ilisimasaqanngilluinnarnini Aatsitassarsiornermut Naalakkersuisup ersersippaa. Naalakkersuisup arlaleriarluni oqaatigaa uranimik saniatigooralugu pissarsiatut piaanissap akuersissutigineqarnissaa kisiat Inatsisartut taasissutigissagaat. Tamanna paatsuugassaangitsumik kukkuneruvoq taamaamat innuttaasut ministerimit akisussaasuusumit eqqunngitsumik paasitinneqaqqunagit Naalakkersuisut qinnuigineqarput erngerlutik erseqqissaateqaqqullugit.

2.

Naalakkersuisut uppernarsarsinnaavaat taasissutigineqartussap qulequtaannaa, tassa imaappoq aalajangiiffigisassatut siunnersuutip qulequtaa, taannaasoq Inatsisartut sulinerminni isummerfigisassaat. Taannami apeqqutaavoq qanoq ittumik aalajangiisoqarnissaanut.

3.

Uranip oqallinnermi initunerarnerarlugu Aatsitassarsiornermut Naalakkersuisup oqaaseqarnera Naalakkersuisut isumaqatigaat? Taamaassappat: taavami atortussiassanik qinngornernik uloriarnartunik akulinnik piaanissamut tunngangippat taava Naalakkersuisut isumaat malillugu immikkoortoq 106 sumut tunngava?

4.

Uranimik atortussiortut isumaqatissarsiornermut soqutigisaminnillu sullinnermut aningaasarpassuarnik atuisarnerat Naalakkersuisut ilisimavaat? Taamaassangippat: Naalakkersuisut isumaqarpat uranimik atortussiortut aalajangiisartunut inoqarfinnullu sammisumik minnerpaakkulluunniit isumaqatissarsiorneq ajortut?

5.

Naggataatigut § 37 naapertorlugu apeqquteqaatini nr. 176-imi aamma 118-imi akissutitik suli aalajangiusimaneritik Naalakkersuisut qinnuigineqarput uppersaaqqeqqullugit. Taakkunanga ersarissumik takuneqarsinnaavoq aatsitassarsiornermi saniatigooralugu pissarsiaq piffissap ingerlanerani pingaarnertut tunisassiarineqalersinnaangussasoq, uranip saniatigooralugu pissarsiatut piiarneqarneranit pingaarnertut paaasoqarneratigut paaaffimmik Naalakkersuisut matusisinnaangitsut, taavalu saniatigooralugu pissarsiaanera pingaarnertulluunniit pissarsiaanera apeqqutaatinnagit malittarisassat navianartullu assigiinnassasut.

(Inatsisartunut ilaasortaq, Naaja H. Nathanielsen)

Tungavilersuut

Oktoberip 15-iani KNR-ip oqalliffiani minutsit 7:42 ingerlareersullu tusagassiortup Aatsitassarsiornermullu Naalakkersuisup Jens-Erik Kirkegaardip akornanni ima akiorittoqarpoq:

Naalakkersuisoq

Oqaqqaalaassaanga isumaga malillugu oqallinnermi uraninitummat. Uran saniatigooralugu pissarsiatut piiarneqarsinnaaleqqullugu paaaffinnik akuersisalernissamut siunnersuut tungavoq, tassa imaappoq imaangitsoq...(tusagassiortup nipangersippaa)

Tusagassiortoq

Jens-Erik, saniatigooralugu pissarsiatut paaanissaq pineqanngilaq, pineqarpoq akuersaanngilluinnarnissamik politikkeqarnerup atorunnaarsinneqarnissaa, taava uranimik paaasunnguaqalersinnaangussaaq

Naalakkersuisoq

Siunnersuut atuaraanni – aalajangiiffigisassatut siunnersuut, tassani allassimavoq uranip saniatigooralugu pissarsiatut paaarneqarnissaa pineqartoq, naak...(tusagassiortup nipangersippaa)

Tusagassiortoq

Siunnersuummi taama allassimasoqanngilaq. Tamanna arlaleriarlugu oqaatigisarparput, tamanna eqqunngilluinnaaqqissaarpoq. Siunnersuummi allassimavoq akuersaanngilluinnarnissamik politikkeqarnerup atorunnaarsinneqarnissaa. Punktum.

Naalakkersuisoq

Suu, qulequtaq taama oqaasertaqarpoq

Tusagassiortoq

Taamaappoq, tassa ilissi taasissutigisassarsi. Tassa ilissi oktoberip 24-ani taasissutigisassarsi.

Naalakkersuisoq

Taamaappoq, kisianni akuersaanngilluinnarnissamik politikkeqarnerup atorunnaarsinneqarnissaa taasissutigineqaraluarpalluunniit taamaallaat akueriniarparput saniatigooralugu

pissarsiatut piaanissaq. Akuersaanngilluinnarnissamik taagorneqartoq massakkut atuut-
toq 60 ppm-iuvoq. Assersuutigalugu Kuannersuarni suliniutigineqartoq 350 ppm

Tusagassiortoq

Teknikkimut tunngasut maana iserfigissanngilagut, kisianni akuersaanngilluinnarnissamik politikki atorunnaarsikkussiuk taava uranip saniatigooralugu pissarsiatut, pingaarnertut pissarsiatut imaluunniit kisiartatuatut piaanegaarnissaa tunngaviatigut akuerineqarsinnaalissaq. Taamaattoqarnera ilaa isumaqatigiissutigisinnaavarput?

Naalakkersuisoq

Suu. Tassa ullumikkut taamaasiortoqarsinnaalissaq, aamma taamaasiortoqarsinnaavoq. Inatsiseqanngilaq taamaasiortoqarnissaanut inerteqqutaasumik. Politikikkut isummerneruvoq, taamaammanuna taamaallaat aalajangiiffigisassatut siunnersuut eqqartoripput marloriarluta isummerfigisassarput, tassami inatsisissatut siunnersuutit pingasoriarneqartarput. Taama oqaaseqareerlunga aalajangiusimavara saniatigooralugu pissarsiatut piaanissaq pigipput. Taannaanaavoq. Saniatigooralugu pissarsiatut piaanissaq taannaavoq politikikkut nutaamik isummiutissaq.

Tusagassiortoq

Soormi siunnersuummi allassimasoqanngila saniatigooralugu pissarsiatut piaanissaq pineqartoq?

Naalakkersuisoq

Allassimasoqarpoq, siunnersuut naallugu atuaraanni

Tusagassiortoq

Siunnersuutertarpiaani taama allassimasoqanngilaq

Naalakkersuisoq

Taamaannersoq misissulaaqqittariaqassavara. Taamaassorinngiivippara. Isumaqarpunga allassimasoqartoq uranimik misissuinerpiaat itigartinneqarnissaannut Naalakkersuisut pisinnaatitaaffitsik aalajangiusimagaat

Aallakaatitaq 20:21-nik ingerlareersorlu Naalakkersuisoq

Uteqqissavara, oqallinnermi uran initoorujussuuvoq. Saffiugassat qaqutigoortut piiaruppagut taavalu uran saniatigooralugu pissarsiatut qallorneqassappat taava soorunami ajornartorsiut tamanna aqussinnaavarput uagutsinnullu iluaqutissanngorlugu atorlugu.

Immikkoortup 106-ip qanittumi suliarineqarnissaa pillugu ullut qassissunnguit qaangiuppata saaffiginnissutip matuma akineqarnissaa qinnutigissavara